

Harap hakisan Pantai Remis diberi perhatian

KUALA SELANGOR

— Kerajaan negeri wajar menitikberatkan isu pemulihan dan pemeliharaan dalam peruntukan RM7.75 juta yang diumumkan untuk pembangunan industri pelancongan Selangor.

Ahli Parlimen Kuala Selangor, Datuk Seri Dr Irmohizam Ibrahim berkata, dua isu itu perlu diberi perhatian memandangkan faktor geografi muka bumi merupakan elemen utama dalam industri pelancongan.

“Saya menyambut baik cadangan kerajaan negeri yang memperuntukkan dana untuk industri pelancongan dalam pembentangan bajet baru-baru ini, namun kerajaan negeri tidak boleh memandang enteng aspek penyelenggaraan.

“Sehubungan itu, saya meminta agar fokus terbabit tidak meminggirkan masalah hakisan Pantai Remis, Kuala Selangor yang berlarutan hampir empat tahun sehingga kini masih belum ada penyelesaian konkrit,” katanya.

Menurutnya, masalah



IRMOHIZAM

terbabit bukan hanya menjejaskan jumlah kehadiran pelancong, bahkan turut memberi impak negatif kepada ekonomi penduduk setempat.

“Harus diingat, sudah menjadi tanggungjawab kerajaan negeri untuk memastikan kemudahan dan infrastruktur Pantai Remis ini terus dimajukan dan dinaiktarafkan demi manfaat semua.

“Langkah proaktif seperti membina benteng penahan ombak perlu diambil supaya keindahan pantai dan kegiatan ekonomi penduduk setempat dapat dikekalkan,” katanya.